



COMUNE DI ORISTANO

Comuni de Aristanis

Piazza Eleonora d' Arborea n° 44, 09170

www.comune.oristano.it

DECRETU DE SU PRESIDENTI DE SU CONSILLU COMUNALI N° 3 DE SU 20/10/2020

Ogetu: APRETU SANIDÀRIU COVID-19. DPCM 18.10.2020. SU DE FAI IS ATÒBIUS DE SU CONSILLU COMUNALI E DE IS CUMMISSIONIS CONSILIARIS DE ATEU IN S'ARRETTA.

SU PRESIDENTI DE SU CONSILLU COMUNALI

Arremonau su decretu suu giai fatu n. 1 de su 23.03.2020 cun: “*Determinatzioni critèrius po fai is atòbius de su consillu comunali in regimi de apretu sanidàriu Covid - 19*” cun chi, ammanchendi regulamentu apostu, si disponiat a manera straordinaria, motivada de s'apretu sanidàriu chi est in s'ogetu, de atobiai apari de immui in antis su Consillu Comunali in videu cunferèntzia, cun s'aplicativu chi si tzèrriat “Zoom meeting” finas a acabbai s'apretu sanidàriu.

Arregordau ca cun delibera afatanti de su Consillu Comunali n. 15 de su 5 de maju de su 2020 s'est cunfirmadu e fatu suu is critèrius po atobiai apari su Consillu Comunali stabilius in su decretu suu n. 1 de su 23 de martzu de su 2020 arremonau asuba.

Arregordau aici etotu ca cun decretu suu afatanti n. 2 de su 15.06.2020, cunsiderendi ca sa situatzioni in s'interis fiat andada in mellus, si disponiat de torrai a primìtziu – arripetendi totu is mesuras e garantzias de sa seguresa – sa manera de fai is atòbius de su Consillu Comunali e de is Cummissionis Consiliaris in àula.

Arreconnotu a craru ca me in is ùrtimus diis s'est arregistrau unu agràviu mannu de sa situatzioni epidemiologica de Covid-19 in totu su territòriu natzionali e regionali.

Biu in propòsitu su D.P.C.M. 18 de su mesi de ladàmini de su 2020 cun “*Mesuras apretosas po poni frenu a su cuntàgiu in totu su territòriu natzionali*”, innui, in mesu a totu unas cantu mesuras po non fai spaniai s'infetzioni de Covid-19, si disponit, in mesu a àteru, s'òbrigu po is amministratzionis pùblicas de s'atobiai apari de atesu, sarvu chi non ddui siant arraxonis motivadas.



Crètiu po tanti de depi torrai a fai, movendi de immui etotu, is atòbius de su Consillu Comunali e de is Cummissionis Consiliaris de atesu in arretza.

Biu:

- ☐ Su T.U. Entis Localis aprovau cun D. Lgs. n. 267 de su 2000.
- ☐ S'Istatutu Comunali.
- ☐ Su regulamentu po fai funtzionai su Consillu Comunali.

DECRETAT

1. A manera straordinaria e movendi de immui etotu, motivada de s'apretu sanidàriu nau in antis, de atobiai de immui in antis su Consillu Comunali in vèdeu cunferèntzia, cun s'aplicativu "Zoom meeting" finas a acabbai s'apretu sanidàriu e comenti si siat finas a s'arrèvoa crara de custu decretu. Custa manera s'at a poni in òpera me in is compùterus o compùterus de portai avatu o tàulas eletrònicas o telèfonus intelligentis, cun sa consulèntzia e s'agiudu de personali incarrigau de su servìtziu CED de su Comuni.
2. De arreconosci a craru ca is atòbius de atesu in arretza s'ant a fai segundu is crìterius giai stabilius cun decretu suu n. 1 de su 23.03.2020, chi at cunfirmau in fatu e fatus suus su Consillu Comunali cun delìbera. n 15 de su 5 de maju de su 2020 comenti arremonau ananti:
 - a) Is cumponentis de su Consillu si podint collegai de cali si siat logu bastit chi non siat logu pùblicu o abertu a su pùblicu e in ònnia modu pighendi totu sa spertesa tècnica po ndi asegurai s'arriservatesa (es. usu de cùfias).
 - b) Is atòbius s'ant a cunvocai cun unu avisu mandau in antis 5 diis prima a sa posta eletrònica de cadaunu Consilleri a firma de su Presidenti, po mesu de is ufizius de Segreteria Generali.
 - c) Is delìberas ogetu de dibata si depint intregai assumancu 5 diis in antis de s'atòbiu fissau, a s'ufiziu segreteria generali chi s'at a incurai de ddas poni in s'àrea reservada a is Consillieris Comunalis.
 - d) Is propostas de delìbera s'ant a depi intregai in sa Segreteria Generali cun totu is parris chi abisòngiant, tènicus e contàbilis, e candu est de abisòngiu, de cussu de su Collègiu de is Arrevisoris e ant a depi portai totuis allegaus chi serbint po cumpletai s'àutu.



COMUNE DI ORISTANO

- e) Su Segretàriu Generali chi agiudat a s'òrganu collegiali s'at a incurai de apurai e certificai is consilleris chi pigant parti a s'atòbiu e chi ddui est su nùmeru legali e sa corretesa de su votu de totu is chi ddui funt, chi s'at a fai cun decrarazioni apostada de ònnia Consilleri.
- f) S'at a assegurai una publicidadi futa de is atòbius publichendi s'avisu de cunvocazioni in s'albu pretòriu in lìnia e in su situ istituzionali. Is atòbius, in prus, s'ant a donai, candu si podit, in dereta a flussu multimediali e s'ant a arregistrai.
- g) S'apellu s'at a fai prima de sa discussioni de ònnia argumentu iscritu in s'òrdini de sa dii. Is Consilleri chi s'ant a bolli scollegai e lassai s'atòbiu ddu depint comunicai a craru a su Presidenti e su Segretàriu Generali, po mesu de is dipendentis de agiudu, ndi at a depi annotai s'ora.
- h) S'òrdini de is interventus s'at a fai cun interpellu a incuru de su Presidenti ligendi is nòminis de is Consilleri in òrdini alfabèticu.
- i) A s'acabbu de s'atòbiu su Presidenti s'at a incurai de fai un'arresùmini de is decisionis pigadas, torrendi a arremonai a cadauna is votus in favori, contras, astènnius e is chi no ant votau.

Si torrat a marcai ca is atòbius si podint traciai gràtzias a s'arregistrazioni de cussas etotu, mentras sa trasparèntzia s'at a assegurai cun is maneras ordinàrias de publicazioni in s'albu pretòriu e in sa setzioni apostada de amministratzioni trasparenti de su situ istituzionali.

Custu decretu, s'at a incurai de nci ddu mandai a totu is Consilleri, a su Sìndigu, a sa Giunta Comunali, sa Segreteria Generali e s'at a publicai in s'albu pretòriu in lìnia.

Aristanis, su 20/10/2020

Cun firma digitali de su Presidenti
de su Consillu Comunali
FRANCESCHI ANTONIO